

**SOALAN NO. 57****PEMBERITAHUAN PERTANYAAN DEWAN RAKYAT**

**PERTANYAAN : LISAN**

**DARIPADA : YANG BERHORMAT TUAN M. KULASEGARAN  
[IPOH BARAT]**

**TARIKH : 24 JULAI 2017**

**SOALAN :**

**YB Tuan M. Kulasegaran [Ipoh Barat] minta PERDANA MENTERI menyatakan:-**

- (a) memberikan perkembangan terkini, mengenai menghapuskan hukuman mati dan moratorium bagi hukuman mati; dan
- (b) berapakah jumlah banduan yang masih menunggu pelaksanaan hukuman mati di penjara dan moratorium bagi hukuman mati.

**JAWAPAN: YB DATO' SRI AZALINA BINTI OTHMAN SAID,  
MENTERI DI JABATAN PERDANA MENTERI.**

Tuan Yang di-Pertua,

Untuk makluman Ahli Yang Berhormat, Kerajaan melalui Jabatan Peguam Negara telah menjalankan satu kajian bagi meneliti isu undang-undang dan dasar hukuman mati dalam negara kita. Kajian tersebut telah dijalankan melalui International Centre for Law and Legal Studies (I-CeLLS) oleh Jabatan Peguam Negara dengan kerjasama pakar-pakar antarabangsa dalam bidang ini. Laporan kajian tersebut telah dibentangkan dalam Mesyuarat Jemaah Menteri.

Jemaah Menteri seterusnya memutuskan supaya Akta Dadah Berbahaya 1952 dikaji semula khususnya bagi memberi ruang budi bicara kepada Hakim dalam menjatuhkan hukuman dengan menetapkan hukuman yang bersesuaian khususnya ke atas kes-kes di mana pesalah sebenarnya lebih wajar hanya dihukum penjara, tetapi mungkin peruntukan yang sedia ada Hakim tiada pilihan selain menjatuhkan hukuman mati. Hasil kajian tersebut telah dibentangkan dalam Mesyuarat Jemaah Menteri pada 1 Mac 2017 di mana Jemaah Menteri telah bersetuju dan memutuskan bahawa pindaan dibuat kepada seksyen 39B, Akta Dadah Berbahaya 1952 dengan memasukkan peruntukan tambahan bagi memberi kuasa budi bicara kepada mahkamah menjatuhkan hukuman selain daripada hukuman mati mandatori dalam keadaan-keadaan tertentu yang ditetapkan bagi kesalahan mengedar dadah di bawah seksyen 39B akta berkenaan. Justeru itu, Kementerian

serta agensi yang berkaitan seterusnya akan menyediakan Memorandum Jemaah Menteri yang baru bersama-sama dengan cadangan pindaan kepada Akta Dadah Berbahaya 1952 untuk pertimbangan dan kelulusan Jemaah Menteri.

Untuk makluman Ahli Yang Berhormat juga, satu Jawatankuasa Khas berkaitan hukuman mati juga telah ditubuhkan pada 5 September 2016 yang dianggotai oleh wakil-wakil dari SUHAKAM, Amnesty International, Majlis Peguam Malaysia, ahli akademik, Jabatan Peguam Negara, Kementerian Dalam Negeri dan juga Majlis Keselamatan Negara. Pelbagai isu berkaitan hukuman mati juga telah dibincangkan dalam Jawatankuasa Khas sebagai proses konsultasi dengan semua pihak-pihak yang berkepentingan.

Untuk makluman Ahli Yang Berhormat, terdapat 1,174 orang banduan yang telah dijatuhi hukuman mati yang masih dalam proses rayuan di Mahkamah Rayuan, Mahkamah Persekutuan dan Lembaga Pengampunan Negeri.

Sekian, terima kasih.

**NO. SOALAN: 58**

**PEMBERITAHUAN PERTANYAAN BAGI JAWAB LISAN  
DEWAN RAKYAT**

**PERTANYAAN : LISAN**

**DARIPADA : DATUK JUSLIE BIN AJIROL [LIBARAN]**

**TARIKH : 24 JULAI 2017**

**RUJUKAN : 9943**

**SOALAN:**

**Datuk Juslie Bin Ajirol [Libaran] minta MENTERI DALAM NEGERI menyatakan keberkesanan Jihad Memerangi Dadah dan masyarakat semakin bimbang berikutan peningkatan tangkapan penagih dadah seramai 30,844 orang pada 2016 berbanding 26,000 pada 2015 dan berapa pula pada tujuh bulan pertama mengikut negeri pada 2017.**

**JAWAPAN :**

Tuan Yang di-Pertua,

Kerajaan memandang serius permasalahan dadah menerusi usaha-usaha pembanterasan secara berterusan. Jemaah Menteri dalam mesyuaratnya pada 10 Mac 2017 telah meluluskan Dasar Dadah Negara sebagai sumber rujukan dan panduan utama dalam usaha memerangi dadah bagi semua peringkat pelaksanaan di seluruh negara. Dasar ini mempunyai 5 teras utama iaitu Teras Pencegahan, Teras Rawatan dan Pemulihan, Teras Penguatkuasaan, Teras Kerjasama Antarabangsa dan Teras Pengurangan Kemudaratan.

Kementerian Dalam Negeri (KDN) melalui Agensi Antidadah Kebangsaan (AADK) telah merangka Pelan Strategik Pelaksanaan Dasar Dadah Negara secara menyeluruh dan komprehensif bagi memastikan keberkesanan pelaksanaan dasar ini oleh Badan Kerajaan serta Badan Bukan Kerajaan di peringkat negeri dan daerah.

Dalam memastikan Dasar Dadah Negara menepati teras yang digariskan, KDN akan memastikan AADK menyediakan penilaian berterusan melalui penilaian awal, penilaian keperluan dan penilaian impak merangkumi kepuasan pelanggan. Syor-syor penilaian hendaklah dikemukakan kepada Jentera Penyelarasan Pelaksanaan Dasar Membanteras Gejala Dadah Negara seperti

yang diwujudkan melalui Arahan YAB Perdana Menteri No. 1 Tahun 2004.

Untuk makluman Ahli Yang Berhormat, Forum Jihad Memerangi Dadah yang dianjurkan oleh Majlis Perundingan (MPM), Utusan Melayu, Yayasan Pencegahan Jenayah Malaysia (MCPF) dan Persatuan Mencegah Dadah Malaysia (PEMADAM) yang telah diadakan pada 14 Jun 2017 merupakan platform kepada masyarakat untuk membantu Kerajaan memerangi masalah penyalahgunaan dadah. Peserta forum bersetuju bahawa penglibatan semua lapisan masyarakat merupakan kunci utama yang boleh memerangi penyalahgunaan dadah di Malaysia.

Jumlah tangkapan dari Januari hingga Jun 2017 adalah seramai 10,004 orang.

**NO. SOALAN: 59**

**PEMBERITAHUAN PERTANYAAN BAGI JAWAB LISAN  
DEWAN RAKYAT**

**PERTANYAAN : LISAN**

**DARIPADA : DATO' SRI DR. HAJI IRMOHIZAM BIN  
HAJI IBRAHIM [KUALA SELANGOR]**

**TARIKH : 24 JULAI 2017**

**RUJUKAN : 9944**

**SOALAN:**

**Dato' Sri Dr. Haji Irmohizam Bin Haji Ibrahim [Kuala Selangor]** minta **MENTERI DALAM NEGERI** menyatakan mengenai kepentingan kewujudan pangkalan data DNA bagi mengatasi masalah kesulitan siasatan kes jenayah dan identifikasi mangsa bencana serta kebaikan yang diperolehi menerusi cadangan mewujudkannya.

**JAWAPAN :**

Tuan Yang di-Pertua,

Penggunaan DNA dalam siasatan adalah bertujuan untuk mengenalpasti identiti individu (suspek) berdasarkan sampel biologi yang ditinggalkan pada sesuatu tempat kejadian. Sumber DNA di tempat kejadian jenayah boleh diperoleh daripada pelbagai sumber seperti air liur, darah, peluh, *semen* dan lain-lain. Databank DNA (*Forensic DNA Databank Malaysia – FDDM*) merupakan alat baharu dalam siasatan sains forensik yang dapat mengenalpasti serta menghubungkan kait seseorang yang disyaki dengan sesuatu perlakuan kejadian jenayah berdasarkan sampel DNA yang ditinggalkan (*contact trace evidence*) semasa perlakuan jenayah dilakukan. Terdapat juga kes jenayah yang tidak mempunyai sebarang petunjuk selain daripada bahan bukti biologi. Justeru dengan adanya pangkalan data DNA, maklumat DNA boleh disimpan sementara menunggu padanan profil daripada sampel DNA melalui indeks seperti mana yang diperuntukkan di dalam Seksyen 3(3) Akta Identifikasi DNA 2009. Sehubungan itu, Jabatan Siasatan Jenayah (JSJ) khususnya dan PDRM amnya dapat mengaplikasikannya sebagai alat baharu dalam pencegahan jenayah dan meningkatkan kadar penyelesaian kes jenayah serta kadar pertuduhan kes di mahkamah.

Selain itu, DNA turut digunakan dalam proses mengidentifikasikan mangsa bencana khususnya apabila mangsa tersebut tidak dapat lagi dikenal pasti melalui pengecaman fizikal (pengecaman wajah dan cap jari). Ini sejajar dengan objektif Databank DNA Malaysia seperti yang dinyatakan di bawah peruntukan Seksyen 4(1) Akta Identifikasi DNA 2009, iaitu untuk menyimpan dan menyelenggara indeks-indeks sepertimana peruntukan Seksyen 3(3) Akta yang sama bagi maksud mengenalpasti identiti individu berhubung dengan penyiasatan sains forensik. Selain itu, Seksyen 4(2) pula menyatakan sebagai tambahan kepada Subseksyen 4(1), profil DNA dan apa-apa maklumat berhubung dengannya yang disimpan dan diselenggarakan di dalam Databank DNA boleh juga digunakan untuk mengenalpasti jasad manusia (mayat) dalam kejadian bencana (*Disaster Victim Identification - DVI*) atau bagi maksud kemanusiaan dalam kes pengenalpastian orang yang masih hidup atau yang telah mati (mayat) – kes orang hilang (*Human Identification for Missing Person*). Justeru mana-mana mayat yang tidak dapat dikenal pasti secara fizikal dapat diserahkan kepada keluarganya berdasarkan profil DNA yang telah dilakukan padanan (*matching*).

**Kebaikan pewujudan Databank DNA ini adalah seperti berikut:**

- i) meningkatkan kadar penyelesaian kes melalui padanan antara profil DNA daripada tempat kejadian jenayah dengan penjenayah;**
- ii) menjimatkan masa siasatan dengan mengenalpasti penjenayah melalui carian profil DNA;**
- iii) berupaya menjadi salah satu faktor pencegahan jenayah apabila penjenayah-penjenayah yang pernah ditangkap sebelum ini menyedari risiko bahawa mereka boleh ditangkap semula sekiranya melakukan jenayah melalui pengesanan profil-profil DNA mereka yang telah wujud dalam Databank DNA; dan**
- iv) memudahkan dan mempercepatkan pengurusan pengenalpastian identiti mangsa bencana.**

**Bahagian Databank DNA telah ditubuhkan dan beroperasi sejak tahun 2013. Sehingga kini, terdapat lebih kurang 62,000 profil DNA yang terdiri daripada 7 indeks (Orang Tahanan, Orang Yang Disyaki, Penagih Dadah, Pesalah Disabitkan, Orang Hilang, Sukarela dan Tempat Kejadian) telah disimpan di dalam Databank DNA. Bahagian Databank DNA telah berjaya mengenalpasti suspek bagi 13 kes jenayah melibatkan kes rogol, samun dan bunuh.**